

## 每週經課朗誦經文（巴克禮漢羅/教羅）2015/02/01

### 共同經課-1 申命記十八章十五節～二十節

15 耶和華你 ê 上帝 beh tù lín 中間，tù lín ê 兄弟，興起先知親像我，lín tiòh 聽 thàn 伊。16 照你 tī Hô-liát 聚會 ê 日，tù 耶和華你上帝一切所求 ê，講：莫得 hō 我 koh 聽見耶和華我 ê 上帝 ê 聲；也莫得 hō 我 koh 看見 chit-ê 大火，免得我死無。17 耶和華就對我講，In 所講 ê 是好。18 我 beh tī in 兄弟中，kā in 興起一個先知親像你，我 beh 將我 ê 話 hē tī 伊 ê 嘴，伊 beh 將我一切所命令 ê 對 in 講。19 伊託我 ê 名來傳我 ê 話，人若 m̄ 聽，我 beh 辦伊。20 總是先知自專託我 ê 名，講我所無命令伊講 ê 話，á 是奉別 ê 上帝 ê 名來講：hit-ê 先知 tiòh 死。

### 共同經課-2 詩篇一一一篇

1 Lín tiòh o-ló 耶和華。Tī 正直人 ê 會中，kap 公會中，我 beh 專心感謝耶和華。2 耶和華 ê 所做真大，凡若歡喜伊所做 ê，lóng beh 查考伊。3 伊所行 ê 是尊貴威嚴；伊 ê 義永永 tī-teh。4 伊行奇事，hō 人記念；耶和華有恩惠，有憐憫。5 伊賞賜米糧 hō 敬畏伊 ê 人；伊 beh 永遠記念伊 ê 約。6 伊將伊大權能 ê 所做顯明 tī 伊 ê 百姓；將列邦 ê 業賞賜 in。7 伊 ê 手所做是誠實公平；伊 ê 教示 lóng 是確實。8 是永世代堅固 ê，是照誠實正直設立 ê。9 伊 òng 伊 ê 百姓施行救贖；伊定 tiòh 伊 ê 約，直到永遠；伊 ê 名是聖，thang 驚畏。10 敬畏耶和華是智慧 ê 根本；見若照 án-ni 行 ê，chiah 有聰明；耶和華 ê 名聲直到永遠。

### 共同經課-3 哥林多前書八章一節～十三節

1 論到祭偶像 ê 物：咱知咱 lóng 有知識。知識會致到自高；但是仁愛會建立德行。2 人若 phah 算伊有所知，就是伊 iáu-bē 知照所應該知。3 人若疼上帝，chit-ê 人就是 hō 伊所 bat。4 論到食祭偶像 ê 物，咱知偶像 tī 世間是無影 ê，也知上帝獨獨一個，無別個。5 因為雖然有稱做上帝 ê，或是 tī 天裡或是 tī 地裡，親像有 choē-choē 上帝，choē-choē 主；6 但是咱 chí 有一個上帝，就是父，萬物本 tù 伊，咱也歸 tī 伊；koh 有一個主耶穌基督，萬物 tù 伊，咱也 tù 伊。7 總是人無 lóng 有 chit 號知識；有 ê 拜偶像慣勢，到 ta<sup>n</sup> 掠 hit-ê 祭祀做祭偶像 ê 物來食伊，in ê 良心既然軟弱，所以就 bak-tiòh。8 總是食物 boē hō 上帝歡喜咱；無食，咱無虧損；食，咱也無利益。9 獨獨 tiòh 謹慎，驚了 lín chit-ê 權做軟 chia<sup>n</sup> ê 人 ê 塞礙。10 因為若有人看見你有知識 ê 坐桌 tī 偶像 ê 廟，hit-ê 軟弱 ê 人 ê 良心 kiám 無 tù án-ni 放膽，來食祭偶像 ê 物 mah？11 因為對你 ê 知識 hit-ê 軟弱 ê 人沉淪，就是基督替伊死 ê 兄弟。12 Lín án-ni 得罪兄弟，傷 tiòh in 軟弱 ê 良心，就是得罪基督。13 所以食物若 hō 我 ê 兄弟跋倒，我就永永 m̄ 食肉，免得 hō 我 ê 兄弟跋倒。

### 共同經課-4 馬可福音一章二十一節～二十八節

21 In 人迦百農，耶穌 tī 安歇日入會堂，教示人。22 人奇怪伊 ê 教示；因為伊教示人親像有權 ê，無親像經學士。23 Tú-á 會堂內有一個患 tiòh 鬼 ê 人喉叫講，24 拿撒勒人耶穌，阮 kap 你甚麼干涉？你來 beh 滅阮 mah？我知你是 chī-chūi，就是上帝 ê 聖 ê。25 耶穌責備伊講，你 tiòh 靜靜，tù chit 人出去。26 邪神 thiu-chhoah hit 人，大聲叫，就 tù 伊出去。27 眾人 lóng gông-ngiáh，致到 sa<sup>n</sup> 辯論，講，chit-ê 是怎樣？是新 ê 教示。伊用權命令邪神，邪神也 sūn-thàn 伊。28 伊 ê 名聲隨時遍傳加利利 ê 四方。